



# Bájkkeavijssa NuorttaSálto

Tæksta: Kitty Skapalen  
Járggálibme: Divte Media AS



Simon Piera Paulsen

## NuorajTV:

# dárbulasj fálaladahka!

Gæhtjalimprosjækta NuorajTV le vuorbástuvvam. Álgadiddje dal ruhtadimev áhtsi joarkedittjat fálaladagáv julevsáme nuorajda, mij bádásattjat ádájagijda hiejteduvvá.



Maria Mikkelsen

Prosjækta, mij næhtta-tv baktu ásat mediafálaldagáv julevsáme nuorajda, le vihtta máno vihpan. Barggeguovtes Maria Mikkelsen ja Simon Piera Paulsen libá alvos ássijjt ja aj suohtas ássijjt almodam næhttasijdduj [www.nuorajtv.no](http://www.nuorajtv.no), gánná gájkka sámegiellaj buvteduvvá.

### Vuorbástuvvam

Dájmaddidje Maria Mikkelsen (23) mielas le NuorajTV moatte láhkáj vuorbástuvvam:

- Le tjielgas julevsáme nuora dákkir fálaladagáv dárba. NuorajTV le sjaddam diehttelis oasse nuoraj rutijnajs nehtan, ja nuora ságasti ja dágástalli mij NuorajTV:an dáhpaduvvá, javllá sán. Prosjevta ulmme le læhkám ásadit iehpeformálalasj sámegiellak arenav julevsáme nuorajda. Næhtta-tv baktu galgaj julevsámegiella gullut ja aneduvvat iehpeformálalasj ja sebra-dahkes láhkáj nuoraj gaskan.
- Njálmalasj giella ja ietjálagasj adno le NuorajTV:av ádá ja geldulasj giella-arenan ásadam. Dat laset giella árvov ja nanni nuoraj identitehtav. Ávvusav gá

vuojnáv man moattes NuorajTV:av adni, aj da gudi ælla vuojga sámegiellav oahppam, javllá Mikkelsen.

### - Moadda vuosedime

Filmma ienemus gæhttij le 1300 vuosedime, madi gasskemierre ietján le birrusin 400. Dat le guokta gálmádisoase julevsámegiellagis (Moren-Duolljá, Bårjås 2010) NuorajTV le aj moadda addnevideojt oadtjum, mij lij ájnás oasse fálaladagás:

- Gasskamærrásattjat lip avtav videoav vahkkuj ietjama addnijs oadtjum, ja dat le ihkeva buorre. Le suohtas vuojnnet gáktu nuora prosjevtav birástahhti, javllá mihás Mikkelsen. Barggijda le læhkám hásstalus állu ádá fálaladagáv hábbmit. Valla segadibme suohtasij ja alvos ássijjt gasskan le vuojnunagi vuorbástuvvam.
- Diehttelis máhtta ájn ávddánit jali buoredit NuorajTV-fálaladagáv. Buvtadime álgos ragátmánonn le sihke konsepta ja bargge bæjvállattjat ávdánam. Lin állu mañemussaj gæhttjalam ádá láhkáj ássijjt hábbmit, ja gæhttjalam ádá fálaladagájt dagu chatta ja blogga, láhpat dájmaddidje Mikkelsen.

### Doajvvu boahhteájgge ruhtaduvvá

Ávddáprosjækta le Sámedikkes, Nordlándá fylkkasuohkanis ja Ádástuhttem-,

háldadus- ja girkkodepartementas ruhtaduvvam. Dálle doajvvu prosjektajádediddje Lars Theodor Kintel oadtju rudájt 2011 jage doajmmaj aj:

- Sáddim lip áhtsámusáv ruhtadime gáktuj vaj máhttep joarkket, ja vuorddep vásstádusáv árrat 2011:n. Doajvvop oajvállattja aj árvvon adni ja vuojnni dárbov NuorajTV:as.

### Oarjjelsáme guovlluj vijdedit

Kintel doajvvu prosjevtav vijdedit oarjjelsáme guovlluj aj, ja áhtsá rudájt prosjektavirggáj mij máhtta dáv plánit ja organiserit.

- Oarjjelsáme nuoraj li sæmmi hásstalusá ja dárbo dagu julevsáme nuoraj; giella hæhttu gullut ja aneduvvat. Gá vuojnnet gáktu prosjektá l dánnu vuorbástuvvam, de jáhkkep oarjjelsáme guovlon aj vuorbástuvvá, javllá Kintel. Dan láhkáj le dálle oajvállattjaj duogen mij vijdáppot NuorajTV:ajn dáhpaduvvá. Jus manná nav gáktu álgadiddje doajvvu, de la NuorajTV vas jáhtuj boahám 2011 sijnjuktjamáno.

